

2 TESARÓNKA

Paoro Iokanatsopatakiti Iuaĩkana Tesarónka Auakanimoni

1 ¹Paoro, Sírası, Tximótxio pakini iokanatsopata Teoso mereẽkinimoni Tesarónka sitatxitiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ²Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriini Pirena

³Nitariakori, ãtipirika atxari Teoso: “Erekapitikari pikamakiti Tesarónka auakani ĩkapani,” atxa. Ikara atoko asãpiretari Teoso, kotxi ikiniõtika Teoso sãkire hãuikini apiaãpota. Apaka hĩtiretakakiniua ikiniõtika apiaãpota. ⁴Ininiã apanakini Teoso sãkire auiãkanikata aãuakasaaki, asãpiretana ninoa ate iuikinii hĩte. Ate iuikari himisiritiko himĩteenekini. Ate iuikari hãuikiniri Teoso sãkire. Iteene himaxikiko, himisiritiko pakini, iuaritika himĩteenekari. Iteene hãuikari Teoso sãkire.

⁵Himisiritiko himĩteenekini oerekari Teoso misiritiniri maerekati kamakani, kotxi ikara atão. Hĩte misiritaãka, kotxi hĩkamari hĩauĩte Teoso paniãtakiti, ininiãkara iuamoni apakatapitika hãuini Teoso auĩtetxi ininiãtaãua. ⁶Teoso kamari atão inakaranoka. Ininiã imisiritariko hĩte misiritakani. ⁷Ixipokariko hĩte misiritiko, ate misiritiko apaka. Iuasaaki hĩtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiireririkata. ⁸Xamina tirinakariã imisiritanako Teoso mimarotakani, aãuĩte Xesosi Kristo iokanapirena erekari

makĩpitakani. ⁹Ninoa misiritaãkako ãtipirika. Ikinipoko xipope ninoa ìkapani. !Auiritaãkana Apiananiri auiniãtaã apokinina. !Atamatarina iua iotximere. !Atamatarina iposotiire. ¹⁰Ninoa misiritaãka, Apiananiri kanapiriini õtisaaki. Iuasaaki inakitiakori, isãkire auiãkani, txariko: “Peerekai. Peerekai. ãti kaposotiireri pite atoko inakari !uari,” itxanako. Ikara atoko hĩte apaka sãpiretari iua iuasaaki, kotxi hĩte auikari asãpiretakiti hĩtemoni.

¹¹Ininiã amisãkiretapikari aTeosone hĩte ìkapani. Ia atoko atxari iua: “Pite akiritari Tesarónika auakani pinakitiakori ininiuana ìkapani, ininiã ninirekari pite apokaerekatiniri ninoa kamakiti pite ìkapani. Pisikaposotiiretana ninoa ikinipoko inireẽkitina erekari ikaminina ìkapani. Ninoa auikari pisãkire, ininiã iparĩkauatana pite ìkapani. Ininiã pisikaposotiiretana ninoa ikara iparĩkana ikaminina ìkapani.” ¹²Ikara atoko amisãkiretari Teoso, kotxi apanakini atamatakasaakiri erekari hĩkamakiti, itxarinako aãũite Xesosi Kristo: “Peerekai pite,” itxanako, ininiã Xesosi uãka iuikaãka. Apaka Xesosi txaike hĩte: “Peerekai hĩte,” itxaiko. Ikara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

Apia Maerekati Apokini

2 ¹Nitariakori, maxinikari aãũite Xesosi Kristo kanapiriini. Maxinikari iuakata aãpotiitiniua. Ikara axinikasaaki, aõtãkikai hĩte. ²Apanakini sãpiretai: “Apiananiri kanapiriini õti apokapeka,” itxana. Maerekaxiniretika !hĩtxape. Ikara atoko inakasaakina, !hĩpĩkarauatape. Paxirari ninoa sãkire. Atxiĩti ninoa txari: “Erekari Matamatakoti sãpiretano ikara.” Atxiĩti ninoa txari: “Paoro sãpiretari ikara.” Atxiĩti ninoa txari: “Paoro iõkatsopatari ikara.” Paxirari ninoa sãkire. Kona hãuikapiri ikara atoko inakari. ³Kona xatiki hãuiritapiri kãkiti misirienetini. Apiananiri kanapiriini apisapanika, kãkiti !nirekari Teoso sãkire ikĩpitini. Iuasaaki maerekati kamakari apiatakari apoka. Xipokatxi ãkiri akiritaãka. Iua xipokaãkapitikako. ⁴Iua apia maerekati !nirekari Teoso paniãtakiti ikamini. Iuikauako. “Kãkiti teosonetakini posotiire poiãoka. Nota posotiire apiata,” itxako. Iuasaaki iitopãka Teoso misãkiretiko aikoti ãki. “Teosorano nota. Notanokara Teoso txaua. ãti Teoso !uari,” itxako iuasaaki. ⁵Hĩtekata nauakasaaki, nisãpiretapekai ikara. Atxiĩti hĩte xinikapanikari nisãpiretakiti? ⁶Uatxa kona apakatapanika iua

apia maerekati apokini. Himarotari Teoso !auiritari iua apokini uatxa. Iketo ötinokara Teoso auiritari iua apokini. Iuasaaki iuaka oerekaua. ⁷Maerekati kipatakori posotiire auape uatxa, iuaritika maerekati mauiritakati !auiritapanikari iteene maerekati iarikini. Äti öti maerekati mauiritakati makatxakaãka. ⁸Iuasaaki iua apia maerekati oerekaua kãkitimoni. Apiananiri kanapiriãkasaaki, okari iua. Ixökare, isinanirenani xipokari iua. Iotximere xipokari iua apia maerekati. ⁹Iua apia maerekati apokasaaki, Satanasi posotiire aua iuamoni. Ikamariko ikini sereti posotiiretxi kãkiti maposotakiniti. Iua oerekari ikara, kãkiti imisirienetini ïkapani, isãkire kãkiti auikini ïkapani. ¹⁰Ikini sereti maerekati ikama kãkiti pïpinanaãkani imisirienetini ïkapani. Ninoa pïpinanaãkani xipokapitikako, kotxi !nirekarina atão inakari itiretinina, ininiã imaerekanina makatxakiko !uari. ¹¹Ininiã iuasaaki Teoso txïkitakana auikinirina ninoa misirienetakani sãkire, ininiã auikarina atão minakati apiatakari. ¹²Ininiã atão inakari mauikakati misiritaãkako, kotxi iteene ipotxitari imaerekani.

Iteene Hãuikariko Teoso Sãkire

¹³Nitariakori, Apiananiri tiretakini, ätipirika erekari amisãkiretiniri Teoso hïte ïkapani ia atoko: “Erekapitikai, kotxi pite mereëna Tesarónika auakani imaerekanina pimakatxakini ïkapani.”

Itixi kamiko apisapanika, iua mereëi hïte. Imakatxakari himaerekani, kotxi Erekari Matamatakoti txïkitakai Teoso nakitiakori hininiua. Imakatxakari himaerekani, kotxi hãuikari atão inakari. ¹⁴Teoso iokanapirena erekari asãpiretakiti hïtemoni hãuikasaaki, iuasaaki Teoso akiritai hïte. Ininiã aãuïte Xesosi Kristo iotximere hïte apaka apakapako. ¹⁵Ininiã nitariakori, iteene kataparaxinire hïtxako. Iteene hãuikariko Teoso sãkire asãpiretakiti, aiökatsopatakiti pakini. !Hïtakanapapiri.

¹⁶Anirekari aãuïte Xesosi Kristo, aïri Teoso pakini sikataparaxiniretinii hïte. Ninoa iteene tirtaua. Ätipirika isikataparaxiniretaua. Isikaua erekari aiãtapini ïkapani. Aimarotari ikara erekari apokapitikako. Ikara atoko inakari ikama ate ïkapani, kotxi isikaua ikinipoko erekari. ¹⁷Erekari hïsäkiretakasaaki, erekari hïkamakasaaki, anirekari isikataparaxiniretinii hïte apikomoni erekari hïkamini ïkapani.

Himisākiretariko Teoso Ate Īkapani

3 ¹Nitariakori, nisākire mapotōkire apoka. Himisākiretariko Teoso ate Īkapani Apiananiri sākire katima iaripiretini Īkapani. Himisākiretariko Teoso Apiananiri sākire auikiko Īkapani, hīte auikiniri atokotxikana. ²Himisākiretariko Teoso imakatzakiniua ate amapinakani Īkapani, maerekati kamakani sauaki aāuakasaaki, kotxi apanakini !auikari Teoso sākire. ³Apiananiri kamari ikinika isākire iaōka. Iua sikataparaxiniretai hīte. Itokapakeētai, ininiā Satanasi !inokai. ⁴Apiananiri txīkitakaua ate aimarotiniri ate paniātakiti hīkamini. Ate imarotari, katana apaka hīkamapanikariko asākire iaōka. ⁵Anirekari Apiananiri oerekinii Teoso tiraōki. Anirekari himīteenekiniri ikinika himisiritiko, Kristo imisiritiko imīteenekini atokokana.

Kākiti Paniātakiti Makīpitakani

⁶Nitariakori, aāuīte Xesosi Kristo nireēkiti iaōka asāpiretai hīte, ininiā apaniātai ia atoko. Hītari kākiti paniātakiti makīpitakati, aōereēkiti iaōka imakamakaniā, ininiā iua moianari !hītxapeuako. Hītakanapariko iua. ⁷Hīte imarotari akamakiti iaōka hīkamini, kotxi hītekata aāuakasaaki ate kīpitari kākiti paniātakiti. ⁸Kona anikari nipokori amaīkitxitakinini. Iuasaaki iteene aparīkauata. Īkanōka, pokamara pakini aparīkauata akiena aiomotini Īkapani, kotxi !anirekari hīte kaamatini hīte kiena. ⁹Apakatapitika kākiti ĩkitxitiniua aparīka Īkapani, iuaritika !anirekari hīkitxitiniua, kotxi anirekari hīte parīkauatini ate parīkauatini atokokana. ¹⁰Hītekata ate auakasaaki, ate paniātai hīte ia atoko: “Kākiti manirekakaniāri iparīkauatini, !inikapani.”

¹¹Ate kenakopiretari hīte sauaki auari kākiti paniātakiti makīpitakani. !Iparīkauatana. Ātipirika ipotxitarina imarotininina āti kākiti kamakiti. ¹²Aāuīte Xesosi Kristo posotiireē, apaniātana kākiti ikara atoko inakani iparīkauatinina. Aōtākikana iparīkanoka ikaminina ikienana apokinina Īkapani. !Himaākatapiri apanakini kamakiti. ¹³Nitariakori, !hīsāpakape erekari hīkamini.

¹⁴Kākiti ereē makamakaniāri ate oṭākikakiti ia iōkatsopariā, erepaniko iua. Iua moianari !hītxapeuako. Hītakanapariko iua, ininiā iuasaaki atxiīti ipētauata. Iuasaaki atxiīti iuaīkana atāo ikama. ¹⁵Imoianari !hītxapeuako, iuaritika himokaiakari !itxaua. Hīpinitariko iua, kotxi hītari itxaua.

Paoro Sákire Mapotókire

¹⁶Anirekari Apiananiri, kākiti kamaerekaxiniretakari, kamaerekaxiniretinii hīte ikiniōtika. Anirekari iua kaikotini hītekata.

¹⁷Nota Paoro iōkatsopata nisákire mapotókire niuakoã. Ia nitakaōtxikare, ininiã himarotari atão ia nota iokanatsopatakiti. Ia atoko inakari niōkatsopata. ¹⁸Aãuīte Xesosi Kristo sikari ikinipoko erekari hīte hīkinikamoni. Ameẽ.